

LEKALA LA MERU, MAKHULO LE PABALLO EA MOBU

Puo ea Letona la Meru, Makhulo le Paballo ea Mobu Mohlomphehi Motlohi Maliehe

Ke motlotlo haholo hoba hara lona sebokeng sena se akaretsang sa selemo se tšoaretsong koano seterekeng sa heso. Ruri taba ena e kholo haholo ho 'na hobane Botha-Bothe mona ke lapeng. Empa kaholimo ho tsohle, le etsa mosebetsi oa bohloakoa haholo o re tumisang hole lichabeng re le naha e nyane fela e hlaisang ka mokhoa o bonahalang sehlahisoa sena se boea.

Lekala lena la heso (Meru, Makhulo le Paballo ea Mobu le Metsi), hara e emeng ea mesebetsi e meholo ea lona, ke paballo le ntlafatso ea makhulo. Melemo ea mantlha ea makhulo naheng ena ea Lesotho, ke hore ke mohloli oa phepo ea liphoofolo tsa Basotho ka mefuta, ke lehae la boieane ba tlholeho, ebile ke sebaka sa mehloli le matša a maholo a fepelang metsi a hloekileng linoka tse phallang ka hare ho naha.

Re tla hopola bahlomphehi hore Lesotho le rekisetsa naha ea boahelani (South Africa) metsi; taba eena ea thekiso ea metsi ke ntho e kholo 'me katleho ea eona e itšetlehile ka kotloloho pa ballong entle ea makhulo le tšireletso ea libaka tsa mekhoabo.

Taba ea paballo le ntlafatso ea makhulo ke boikarebello ba rona kaofela, le hoja bonnete e le hore 'Musu o tlameha hoba lesupa-tsela. Lona lihoai,

barui ba farelane le seiboko 'moho le marena le sechaba sa Basotho, ke le mema ka kotloloho hore le thuse 'Musso mosebetsing ona o moholo oa ho fihlela paballo ea makhulo le tšireletso ea libaka tsa mehloli ea moshoelella hoba boemo bo bonahala ruri bo mpefetse haholo.

Bahlomphehi ba ka,

Ke nka monyetla mokeng ona oa lona ho rapalatsa meralo le methati eo Lekala le rerileng ho e latela ho lokisa boemo bona ba tšenyeho ea naha. Meralo e kenyeletsa tse latelang:

1 Khiro ea Balisa ba Lihlaba ho matlafatsa liteko tsa liofisi tsa borena ba sehloho ho baballa lihlaba le libaka tsa mekhoabo.

Bahlomphehi,

Ka chelete eo paramente e abetseng lekala ho etsa mesebetsi e mengata selemong sena sa tsebetso, karoloana ea eona e tla sebelisoa ho thakhola mesebetsi oa paballo le ntlafatso ea makhulo lihlabeng tsa **Mokhotlong, Botha-Bothe, Leribe, Berea, Mohale's hoek, Quthing le Qacha's nek.** Hona ke feela mokhahlelo oa pele.

2 Ho matlafatsa tšebetso ea ho fothola sehalahala libakeng tse ngata ka hare ho naha.

3 Ho sebetsa le mekhahlelo e fapaneng ea sechaba le litsi tsa tšireletso le makala a 'Musso a amehang ho kenya tsebetsong melao e tšireletsang tikeloho ka bophara.

4 Ho sebetsa 'moho le ho susumetsa makala le litsi tse amehang ho sireletsa libaka tsa mekhoabo ea bohlokoa ka Koranta ea Muso (Government Gazette)

Bahlomphehi ba khabane,

Hape lekala la heso le tla sebetsa ka thata ho:

- Kenya tšebetsong Leano la Naha la Paballo le tšireletso ea makhulo
- Akofisa popo ea molao o laolang litaba tsa Ntlafatso le Paballo ea Makhulo

Ha ke tsoela pele bahlomphehi,

Ke lakatsa ho supa hore Lekala la heso (Ka Lefapha la Ntlafatso le Paballo ea Makhulo), la Temo le Kanetso ea Lijo le la Likhoebo tse Nyane, Likoporasi le Limmaraka, a kene mosebetsing o moholo oa ho atlehisa morero oa Ntlafatso ea Boea ba Farelane le Seiboko (Wool and Mohair Promotion Project).

Le hoja mosebetsi ona o ile oa qala ka lesisitheho, Lekala la heso le se le kene khabong; nka supa fela hore mesebetsi ea sethathong e latelang e simolotse ka matla:

1. Lithupelo tsa bohlanka tse reretsoeng ho ba chorisa ho phetha mesebetsi e fuperoeng ke morero.
2. Matšolo a ho tsebisa mekhahlelo e fapaneng e amehang tsamaisong ea makhulo, joalo ka Marena, Makhotla a Puso a Setereke le Mekhatlo ea Phuliso.

3. Ho se ho hloailoe litsibi tse tlang ho thusa ho matlafatsa litaba tsa mekhatlo ea phuliso ka molaong oa naha oa ntlafatso ea makhulo.
4. Litukiso li ntse li tsoela pele lipakeng tsa Lekala la heso, Morero (WAMPP) le Sekolo se Seholo sa Sechaba (University of Lesotho) ho hlopha manane a thuto a reretsoeng ho fana ka koetliso ho bohlanka litabeng tsa ntlafatso ea makhulo.

Ke a leboha, lihoai tsa heso.

Khotso, Pula, Nala